



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8 Yangia anidakangma : Tir Yimyim tir_yimyim

tir yimyim TAPAK 7

Jannik Sinner-i Australian Open tebur kija asaya kokogo

US-i Greenland angutsü südi ta amanger: Donald Trump



VOL. XXII ISSUE NO. 103 (ADOK 103) DIMAPUR TENTONÜ (MONDAY) AENJETI (JANUARY) 27, 2025 ₹ 5.00

Donald Trump-i Jordan aser Egypt dang Gaza nunger anioktsü ayongzüker

New Delhi, January 26, 2025 (Agencies): United States President Donald Trump-i Gaza nung Israel-Hamas rara anentsü atema osang ka sangoktsüba sülen Middle East nung ken o tasen ka adokogo.

Jordan aser Egypt lennirtem dang Gazan nunger anioktsü atema ayongzüksü ta Trump-i ashiba sülen ken o ka adokogo.

"Ita 15 tashi rarayonga arudang Gaza ya "demolition site" ka kumogo. Ni Egypt aser Jordan dang nübortem aniokdaksünür" ta Trump-i osangbener dang ashi.

Gaza nunger teimba ka Palestinian refugees mesüra parnok nungi jakzükerterem lir.

"Nisung million ka ser tesadang ka shi indang jembir aser onoki iba tesem ajunga samatsüogo" ta Trump-isa ashi.

"Arab linüktem dang shilem agitsü aser tesem balala nung nung kiojen yanglur parnok yimjung nung lidakjang ta ni ayongzüksü" ta paisa ashi.

Hamas-i tawa tu Israel den ceasefire tenangzüktep ka agiogo aser parnok Trump indang tebilemba magizükba metetdaksüogo.

"Palestine nungeri ibala maparen takok mengudaksütsü kechiyong parnok kumtem süia arudang iba mesükba sentongtem atonga inyakogo. Gaza nungeri

ibala inyakyim magizüktsü" ta Hamas political bureau züngsem Bassem Naim-i ashi.

Islamic Jihad-i Gaza nung Hamas den külemi raraogo aser parnok Trump tebilemba ya tesempatsüka ta shiogo.

"Nübertem tashiyim agi pei lima toktsür odaktsüba ajanga war crimes aser crimes against humanity ajungmesor" ta Islamic Jihad-i ashi.

"Trump-i parnok tanga tesem nung oa libaliroa aotsü asoshi yaritepba ya tebilemba tajung ka lir" ta Israeli finance minister Bezalel Smotrich-i ashi.

"Tangatetba tasen kar ajanga dang yimjung aser security bentsür arutsü" ta pai ashi.

Hamas-i ita 15 tashi Israel den rarayonga arudang Gaza nung kiojen 70% jungnüa raksaogo.

Hamas-i Israel yimitem amakdang nisung 1210 tepset aser iba atema Israel-i tayang küpzüka raradang Gaza nung nisung 47,283 süogo aser tasür teimba civilians liasü.

Egypt-i tesüiba nung Gaza nung Palestine nunger tashiyim agi Sinai desert-i meyoktsü shiogo. Iba ajanga 1979 kum Egypt-i Israel den peace treaty sign sütepba nung timtem ajurutsü ta Egypt President Sisi-i ashi.

Külen, Jordan nung Palestinian refugee million 2.3 shi jenoka lir.

ULFA-i Guwahati nung IEDs pokdaksü

Guwahati, January 26, 2025 (Agencies): United Liberation Front of Asom (ULFA - Independent)-i Guwahati kübok tesem balala nung Improvised Explosive Device (IED) pokdaksüba tenung agiba metetdaksüogo.

Deobarnü India Republic Day anema Lalmati aser Beharbari nung bomb pokdaksü ta ULFA-i-i ashi. Ajisüaka, Rehbari tesem nung IED kecha mapok ta osang angazüker.

Tanep 8:00 ako meta Beharbari nung aliba DV Parking nung tapoktsü ka apokba ola angashi. Iba ajanga tesem ajunga mokozü aser auyi agi asung ta parking staff-i ashi.

Iba tesem nung bomb mesükba oset ka yutsü ta staff-i ashi. Ajisüaka, Guwahati police-i iba atema osang kecha mali aser bushisüngdang südar.

ULFA-i-i Assam nunger yirutsütsü atema masü saka Indian Republic Day aser Independence Day magizükba sayua item mapa inyaker ta metetdaksüogo.

Assam linük balaka maküm tashi onoki raratsü aser Assam nüjiso anguba sülen ang India nüjiso aser democracy agizüktsü ta ULFA-i-isa ashi.

Security maparen balala inyakaka onoki Assam ajungalen mapa inyaker ta ULFA-i-isa

metetdaksüogo.

Onoki civilians yirutsütsü atema masü saka India sorkar nem osang sangoktsütsü aser nübertemi national celebrations nung shilem magidaksütsü atema lungkak aitba sentongtem agir ta parnokisa ashi.

Assam Pradesh Congress Committee (APCC) President Bhupen Borah-i bomb pokdaksüba aitsüogo aser yimjung maparen inyaktsü ayongzüko.

ULFA-I lennir Paresch Baruah-i India sorkar den olemtep nung adentsü ayongzüker ta Borah-i ashi.

"Assam nung lanurtemi yimjung aser tensa tesüngjem aginür. Tanü lanuputui terenlok aser teputep aliba tensa ka aginür" ta paisa ashi.

BJP-i yimjung atema inyaker ta ashir saka BJP sorkari Assam nung ozüng alema inyakshiba azüoktsü atema lemtet tajung ka magiteter. Ozüng alema inyakshiba anendaksütsü atema mapa inyaktsüla aser public lendong nung kümzüka ayutsüla" ta Bhupen Borah-isa ashi.

"Assam police-i public safety aser yimjung atema masü saka syndicates nung shilem agiba nisungtem kümzüka ayutsü atema ang temulung agütsür" ta paisa shisem.

Nagaland sorkari yimten latettsü aser FNTA atema inyaker: Governor Ganesan

Kohima, January 26, 2025 (TYO): Naga yimten tebilemstü aser Eastern Nagaland Peoples' Organization (ENPO)-i ahangba Frontier Nagaland Territorial Authority atema meranga inyadar ta Nagaland governor La Ganesan-i Deobarnü ashi.

Secretariat Plaza Kohima nung 76 buba Republic Day benjung amondang Ganesan-i state sorkar ajanga Naga yimten latettsü atema bendanga agüja inyakba nenshia ashi.

Chief Minister Neiphiu Rio, pa kinungtsü Kaisa Rio, Lok Sabha MP Supongmeren Jamir aser MLA tem den ketdangsurtem aika lia Governor-i iba osang sangoktsü.

"State sorkari Naga yimten tebilemstü koktettsü atema November 21 nü Chief Minister den Cabinet züngsemtemi Union Home Minister den ajurutep aser Naga nunger taginüba indang osang lemsatepa liasü. Chief Minister aser Cabinet züngsemtemi tekaratiba nung yimten latettsü asoshi inyakba atema pelar aser iba ya nübertemi aginüba ama lir" ta Ganesan-i ashi.

Arrla 371-A kübok Naga nunger inyakyim, sobaliba aser ozüngren kümzüka lir. Nagaland-i linük tejakleni aotsü aser renloktsü atema shilem agia arudang iba maitsü wazüka yua arur, ta pai ashi.

"Ozü sorkari Constitution nung lateta aliba tangatetba atongtsüsa anibelem arema inyaka arur. Constitution nung lateta aliba ama state sorkari Frontier Nagaland Territorial Authority dak sendakba nung Ministry of Home Affairs-i agütsüba Memorandum of Settlement draft atema tebilembatem lemsatepogo" ta Governor Ganesan-isa ashi.

Iba ken o atema olemtep tejakleni odar aser ENPO indang tebilemstütem kasa tangatetba nung angatetepa aotsü imlar, ta paisa ashi.

"1963 nung Nagaland state tentetba sülen nungi Eastern Nagaland tesemtem senzüka yuja arur aser September 2010 nungi ENPO-i state balaka meshir. ENPO-i iba takhangba pusema nungittsü asoshi yaküm Lok Sabha aser Urban Local Body elections mokdanga liasü" ta Ganesan-i ashi.

ENPO-i taoba ita Centre-i ashiba onük khen atema agizükogo. FNTA atema olemtep maneni agidar aser state sorkaria ajak külem ajurutepdak ka bushir. Naga nunger aser ENPO

taginüba ama sorkari lenmang bushiteper, ta paisa ashi.

"India-i linük aka ama kanga renlokogo, ajisüaka 2047 tashi nung developed Country ka akümtsü asoshi sendaktepa alir ajaki education aser human development wadangtem nung külemi inyaka aotsü nungdaker" ta Governor-i ashi.

76 buba Republic Day nungtem nung Governor aser Chief Minister nati Mobile Operation Theatre tenzükja liasü.

Nagaland kübok tesem ajak nung Republic Day junga mongogo aser cabinet ministers o advisors-i district aser sub-divisional headquarters nung linük wako salatsüogo ta police ketdangsur kati ashi.

Parade Ground Secretariat Plaza, Kohima nung Governor La. Ganesan-i awards balala agütsürtem:

- 76th Republic Day celebrations 2025 nung President's Medal for Distinguished Service (Police) sangoktsüba:
1. Imtiakum Pongen Asst. Commandant President's Medal for Distinguished Service. (Awarded)
 1. Rupin Sharma, IPS Director General of Police, Nagaland as announced on Republic Day 2024.
 2. T. Tsenpemo Kikon, NPS, Asst. Commandant 15th NAP(IR)Bn. as announced on Independence Day 2023
 - Police Medal for Meritorious Service announced on the occasion of 76th Republic day celebrations 2025:
 1. Shouka Kakheto, Deputy Commandant.
 2. Zasilie Angami, Sub-Inspector
 3. Metseirovi Sakhrie, Naik
 - Police Medal for Meritorious Service (Awarded)
 1. Sonia Singh, IPS, IGP (Vigilance) as announced on Independence Day 2023
 2. T.Y Ngullie, NPS, Commandant, 11th (IR)Bn. as announced on Independence Day 2023
 3. Peter Shuya, SDPO, Meluri, DEF Phek as announced on Republic Day 2024
 4. Toshimongba Imchen, ABSI, 9th NAP (IR)Bn as announced on Republic Day 2024
 5. Archer Phiyobemo, ABSI, Int. Estt. as announced on Republic Day 2024

- 76th Republic Day celebration 2025 nung Governor's Gold Medal Awardees
1. Suman Shivashankar Sivachar, IFS, Divisional Forest Officer, Wokha
 2. Tsutsowe Kupa, NCS, Under Secretary, State Election Commission.
 3. Lanuchuba Longchar, NPS, Asst. Commandant, 12th NAP (IR)Bn.
- 76th Republic day celebrations 2025 nung Governor's Commendation Certificate Awardees
1. Dr. Hentok Phom, Jt. Director & Nodal Officer Department of Health & Family Welfare, Nagaland House New Delhi.
 2. Dr. Vezokholu Theyo, Jt. Director Department of Health & Family Welfare
 3. Dr. Kevizakie Rio, Dy. Director, Department of School Education
 4. Takatemjen Pongen, NCS, EAC (HQ), Kiphire
 5. P.K. Wangpa Konyak, Asst. Commandant (VG) Mon
 6. Akoba T. Sangtam, ABSI, 3rd NAP Bn
 7. Siezo Zumu, ASI, INT Estt.
 8. Thungchanbemo Lotha, Technical Supervisor, Department of IPR
 9. Tسانthungo Lotha, Head Warden, District Jail, Wokha
 10. Y. Isawoto Jimo, Head GB, Nikheku Village, Niuland District
 11. Krishna Mandal, Sectional Assistant, Nazarat Branch, Home Branch
 12. Y. Pongba Konyak, Burma Camp, Dimapur, Act of Bravery

Chief Minister's Mobile Operation Theatre sayaogo



Kohima, January 26, 2025 (TYO): Republic Day nung Nagaland sorkari Mobile Operation Theatre ka sayaogo. Governor La Ganesan aser Chief Minister Neiphiu Rio nati Secretariat Plaza nung Chief Minister's Mobile Operation Theatre (CMMOT) sayatsü.

CMMOT ajanga Nagaland nung

yimtsüngtem aser meta talang pilar alidak advanced surgical & healthcare services agütsütsü.

CMMOT nung keyhole surgery capabilities dena lir aser yimtsüng o meta talang pilar alidak specialised medical care agütsütsü.

CMMOT nung mobile surgical unit aser portable

diagnostic tools enoka lir aser iba nung ultrasound, X-ray, endoscopy, aser blood testing equipment densema lir.

Kohimas Hospital nungi medical team ka den private aser government doctor temi tangar memeneperitem yaritsü aser nungdabapur kishizüng tonga aotsü.

State kübok tesem balala nung 76 buba Republic Day mungogo



Mokokchung

Changtongya

Chumoukedima

Mangkolemba

Niuland

Dimapur, Aenjeti/January 26 (TYO): India linük ajunga den külemi Nagaland nunga tesem balala nung January 26, 2025 nü 76 buba Republic Day mera keta mungogo.

DIMAPUR: Dimapur nung 76th Republic Day ya District Administration, Dimapur ajanga Dimapur District Sports Council (DDSC) Stadium nung January 26, 2025 nü ayongzüka munga liasü.

Iba sentong Minister, Environment, Forests & Climate Change and Village Guards, C. L. John-i moatsü aser paise linük wako sala, parade semdang aser lokti den jembia liasü.

Iba sentong nung march past ya ABSI Penlei-i anir Dimapur Police Commissionerate, ABSI Vevelotu Curhah-i anir 15th NAP (IR) Mahila Battalion, AIE Teisovizo Kense-i anir Excise Directorate, ABSI Viboto H. Sumi-i anir Nagaland Home Guards, Honorary Captain Chembise Sangtam-i anir Ex-Servicemen, Pongwang-i anir Christian Higher Secondary School, Priyotit-i anir Zakiesato Memorial Higher Secondary School, Tanvir Rahman-i anir Neigulie Memorial High School, Havildar N. Adhikari-i anir 43rd Assam Rifles Band Platoon liasü.

March past ya Parade Commander Zareni Yanthan (Probationer), NPS lenisüba kübok second in command Solo Kath, ABI, Dimapur Police Commissionerate, aser Parade BHM, Havildar Khekato Sema nungeri yaritepa agi.

Shri Digamber Jain Higher Secondary School aser Pranab Vidyapith Higher Secondary School nungi kaketshir temi linük naklo ken aten aser Sumi aser Garo Cultural Troupes ajanga sobaliba tsüngsang agi shilemagia liasü.

Kasa sentong nung department balalai amenoka aliba exhibition stall tem Minister C.L. John-isa semzüksü, aser best-performing contingents nem sempet agüja 43rd Assam Rifles Band Platoon-i anir beating of retreat agia sentong tembang.

MOKOKCHUNG: Mokokchung nung 76 buba Republic Day ya Imkongmeren Sports Complex, Mokokchung nung January 26, 2025 nü munga Deputy Chief Minister and Minister in-charge of Home and Border Affairs, Nagaland, Yanthungo Patton-i linük nisan salatsü aser Republic Day speech agüja liasü.

Yangji march past nung DEF Mokokchung, 2nd NAP, 13th IRB, Home Guards, Ex-Servicemen, NCC MGHSS, Bharat Scouts & Guides aser

Pipe Band (2nd NAP) ajanga shilem agi, kong Parade Commander ya Assistant Commandant, 2nd NAP Battalion, Alichen, Medemkala Tzudir liasü aser ABI, DEF Mokokchung, K. Meren Jamir second in-command liasü.

Iba anogomung sentong nung Ministry of Women & Child Development indang Beti Bachao Beti Padhao sentong kübok District Hub for Empowerment of Women (DHEW) Mission Shakti aser District Administration ajanga UBI Imlichila nem BBBP Champion sempet agütsü, shiba tang Officer-in-Charge, Women Police Station, Mokokchung teinyaktak lir.

Iba kulizüng kaket ya Deputy Chief Minister Y Patton-i amokja liasü.

Iba sentong nung Aosungkum Cultural Club, Mokokchung village aser Longsalong Cultural Club, Mokokchung ajanga cultural presentation agia liasü.

Iba sülen Agriculture Department, SARS Yisemyong, ATMA, Animal Husbandry & Veterinary Services Department, Cooperation Department, Horticulture Department, District Rural Development Agency, Mokokchung District Legal Service Authority, Land Resources Department, District Industries Centre aser Health & Family Welfare Department temi lapokba exhibition stall tem Deputy Chief Minister-i semzüksü.

Nikongdang sentong nung Agri & Allied Departments & Engineering Wing Department aser tanungba department tem tsüngta exhibition football match aser penalty shootout (ladies) asaya liasü.

MON: Mon nung 76 buba Republic Day anogomung ya Advisor, Law & Justice, Land Revenue, T. N. Mannen-i maotsü, koba Mon Local Ground nung agia liasü.

Advisor Mannen-i linük wako salatsüba sülen parade contingents semdanga liasü aser Republic Day message agütsü.

Mon nung march past ya 6th NAP, Tizit, DEF Mon, Village Guards, Ex-Servicemen, Wangkhao Government College, Mon, Mon Vale College, GHSS, Mon Town-A, St. John Higher Secondary School (Boys), St. John Higher Secondary School (Girls) aser 6th NAP Pipe Band nungi liasü, kong Parade Commander ya H. Pongloi, SDPO Tizit liasü.

Advisor T.N. Mannen-isa department aser society balalai amenoka aliba stall tem semzüksü.

Kasa sentong nung Inter-

ward Mon Town Best Christmas Decoration 2024 sempet ya Shantham Ward nem agütsü aser Thannan Ward aser Wagim Ward nem tanabuba aser tasembuba sempet agüja liasü.

Iba sentong nung Chen Area Nokten Union Mon Town aser Shamnyu Ward ajanga sobaliba tsüngsang agi shilem agi aser Samuel Konyak-i linük naklo ken aten.

Iba anogomung nung shilem ka ama nikongdang exhibition football match ka DPDB XI aser CSOs XI tsüngta asayaba nung DPDB XI ajanga takok angu.

Iba sentong nung Deputy Commissioner, Mon, Ajit Kumar Verma, IAS ya Match Patron liasü aser 6th NAP Pipe Band ajanga Beating of Retreat sentong agia liasü.

NOKLAK: Advisor, Treasuries & Accounts and Art & Culture, K. Konngam Konyak-i January 26, 2025 nü Public Ground, Noklak Hq nung 76 buba Republic Day amungdang linük wako salaja liasü.

Paise iba mapang 3rd NAP Noklak, Village Guards Yokao, Village Guards New Pangsha, GHSS Noklak, GHS Noklak, Christian High School, Noklak, St. Paul School Noklak, Holy Angel School Noklak aser Assam Rifles Pipe Band nungi rashtriya salute agia liasü, koba Assistant Commandant, 3rd NAP, Noklak, Tianungba Ao aser second in command, ABSI Pengthong T nati anir liasü. Superintendent of Police, Noklak, Thipuzhoyi-i parade repringshima liasü.

Iba sentong nung Advisor Konngam ajanga HSLC & HSSLC Examination 2023 aser 2024 nung Noklak district nungi takok tajung ngutetba tetsürtem nem Beti Bachao Beti Padhao (BBBP) küm 10 ajungba nungtem nung sempet agüja liasü, koba GHS Noklak nungi Choin M aser GHSS Noklak nungi Chongtie P nati agizük.

Paise sorkar department balala, Noklak District Handloom & Handicrafts Council aser Self Help Groups temi exhibition stalls tem amenoka aliba semzüksü.

Iba anogomung nungtem nung district administration den Heads of Offices aser Red Cross Society Noklak Branch ajanga District Hospital Noklak semdanga liasü.

Nikongdang exhibition football match asayaba sülen Frontier Pipe Band ajanga beating of retreat agia liasü.

CHÜMOUKEDIMA: Chümoukedima district administration ajanga January 26, 2025 nü Samogooting Stadium, DC Complex,

Chümoukedima nung 76 buba Republic Day munga liasü.

Minister, Higher Education and Tourism, Temjen Imna Along arua linük wako salatsüba sülen parade contingents semdanga liasü. Parade contingents ya 15th NAP, 22 Assam Rifles, 15th Mahila IR, Ex-Servicemen, Patkai Army Wing, Patkai Air Wing, Tetso College aser GHSS Chümoukedima nungi liasü, kong Parade Commander ya Ekant Jain, IPS aser Parade Second in-command ya Kahito, ABI, 15th NAP liasü.

Minister Temjen Imna Along-isa Republic Day o jembia aser Kuki Cultural Troupe, Kachari Cultural Troupe, Lotha Cultural Troupe, Sumi Cultural Troupe, Chakhesang Cultural Troupe, Gorkha Cultural Troupe aser Sangtam Cultural Troupe temi sobaliba tsüngsang aser ken agi shilem agi.

Kasa sentong nung Hebron Higher Secondary School, Sovima ajanga special presentation ka agi shilem agi aser Minister Temjen Imna Along-i exhibition stalls tem semzüksüba sülen 22 AR, Medziphema ajanga beating of retreat agia anogo tembanga liasü.

PEREN: Peren nung 76 buba Republic Day ya Deputy Commissioner's Office Complex, Peren nung munga liasü.

Iba anogomung ya Minister, Public Health Engineering and Co-operation, N. Jacob Zhimomi-i linük wako sayaja tenzük aser DEF, Peren; 9th NAP (IR), Saijang; Sainik School, Punglwa; All Saints Higher Secondary School, Peren; Peren Government College, Peren aser Jawahar Navodaya Vidyalaya, Jalukie parade contingents nungi rashtriya salute agia liasü.

Peren nung parade contingents nung Commander ya SDPO Jalukie, Disani Newmai, second in-command ya ABI, Abi Viloto S. Chishi aser Platoon Commander ya ASI, Rampou Guing liasü.

Iba sentong nung Rongmei Cultural Troupe ajanga sobaliba saya balala sayu, PM Shri Government High School, DC Colony Peren ajanga Drum Ensemble aser Pauramdibe Mpom aser Kenlumyile Ngia ajanga special presentation agi shilem agia liasü.

Kasa sentong nung Agri & Allied Departments aser SHGs ajanga amenoka aliba exhibition stalls tem Minister Jacob-isa semzüksü.

Iba anogomung nungtem nung Peren Town Council ajanga Sub-Jail Peren semdang

aser ZOAN ajanga District Hospital Peren semdang aser IRCS & DHEW Peren ajanga Children Home, Peren semdanga liasü.

TUENSANG: Tuensang nung 76 buba Republic Day sentong January 26, 2025 nü Parade Ground, Tuensang nung agia liasü, kong Minister, Women Resource Development and Horticulture, Salhoutuonuo Kruse sentong akumtong ka ama aden.

Minister Kruse-i linük wako salatsüba sülen parade contingents ti - DEF Tuensang, 3rd NAP Tuensang, Home Guards & Civil Defence, Village Guards, Village Ex-Servicemen, NCC, Sao Chang College, Saramati Scouts and Guides, 3rd NAP aser Hauhyang Chuba Pipe Band nungi rashtriya salute agia liasü, kong Parade Commander ya Hopping Chang, Dy. SP (Reserve) liasü.

Iba sentong nung Tuensang District Taekwondo Association ajanga shilem balaka agi, 29 Assam Rifles Tuensang ajanga Dog Show, Changen Cultural Club, Sangli Cultural Troupe, Khamniungan Cultural Club, Kemifu Club aser Tikhir Liujong Pia Lui Dancing Troupe ajanga sobaliba yimya balala nung shilemagia liasü.

Iba anogomung nung ATMA, Horticulture Department, Soil & Water Conservation Department, Agriculture Department, KVV, Fisheries & Aquatic Resources Department, NSRLM, Land Resources Department, Industries & Commerce Department, District Legal Services aser Co-operative Bank Tuensang ajanga exhibition stalls lapokba Minister Kruse-isa semzüksü.

Iba sentong nung MLA Imtichoba Chang, Tuensang district kübok Heads of Offices, police, kaketshir aser Tuensang town nungi nüburttem dena liasü.

ZUNHEBOTO: Zunheboto nung 76 buba Republic Day ya Local Ground, Zunheboto nung munga liasü, kong Advisor, Industries & Commerce, Hekani Jakhalu sentong akumtong ama dena liasü.

Lai linük wako salaja parade contingent ti nungi rashtriya salute agia liasü, kong Parade Commander ya Assistant Commandant Nisazolie Zutso aser ABI Sihu Angami aser Parade CHM ya Honizhe Aye liasü.

Iba sentong nung Kihikali H. Zhimo ajanga temeja ken ka aten aser Department of Art & Culture ajanga sobaliba ken ka tena liasü aser DPDB XI aser NGOs XI tsüngta exhibition football match ka asaya liasü.

Republic Day nü Punjab tesem ajaklen aluyimertemi longkak ait



January 26, 2025 nü Republic Day anogomong nung Punjab nung aluyimertemi tractor parade agia longkak aيتدang tangokba noksa nung angur.

New Delhi, January 26 (Agencies): Amongnü Republic Day anogomong nung Punjab tesem ajaklen Samyukt Kisan Morcha (SKM) kübok aluyimer organization balala nungi aluyimertemi tractor parade agia longkak aitogo.

Aluyimertemi minimum support price (MSP) atema legal guarantee akhangba den külemi aluyimertem aser alu nung aayangertem dang sentsüh atoktsü, electricity privatise masütsü aser National Policy Framework on Agriculture Marketing (NPFAM) agientsü atema sorkar nem takhangba agüja longkak aiter.

SKM lenirtem densema aluyimertem noklang aikati tractor parade nungji shilem agia sorkar nem item takhangba agütsü.

Tesem kar nungbo aluyimertemi tractors nung wako tanak songa liasü.

SKM-i aluyimertem dang January 26, Republic Day anogomong nung linük tesem ajaklen district/sub-divisions nung tractor/motorcycle parade ayongzüka longkak aitba sentong agitsü tuyua liasü.

Tawa SKM-i sangdong ka ajanga, “Tanünga takhangba ajak ataloktsü atema 2020-21 küm Delhi arrtsülen longkak aitba dang nungi tesashiba linük tesem ajaklen longkak aittsü sentong yangluogo,” ta metetdakja liasü.

Ano külen Kisan Mazdoor Morcha (KMM) den SKM (Non-Political)-ia state tesem balala nung longkak ait. Parnoki corporates meyong shopping malls aser silos kima tractors anendener longkak aita liasü.

Tawa Ministry of agriculture Joint Secretary, Priya Ranjan leniba nung sorkar ketdangsertemi SKM (Non-Political) aser KMM den senden amenba mapang nung February 14 nü Chandigarh nung senden mena item takhangba onüktem atema o lemteptsü melungogo.

February 14 nü sorkar ketdangsertem den senden amentsü lia February 12 nü Chandigarh nung aluyimertem organizations nungi lenirtem jelia senden amentsü.

Amongnü Punjab kübok Mohali aser Samrala nung osangbenertem den jembidang SKM lenir, Harinder Singh Lakhwal aser Balbir Singh Rajewal nati, Centre sorkari item takhangba magizükra aluyimertemi longkak tesashiba aittsü, ta metetdaksüogo.

Sri Lanka Navy-i India nunger angopur 34 apu

Colombo/New Delhi, January 26 (Agencies): Sri Lankan Navy sepaitemi parnok tzüyim nung ango apuba atema India nunger angopur 34 den rong asem puogo, ta Amongnü ketdangsertemi metetdaksü.

January 25-26 anogotem nung ozüing alema ango apuba atema India nunger angopurtemji apu, ta Sri Lankan Navy-i metetdaksü.

Northeastern Mannar district kübok tzüyimkümlen Navy temi mita aoba mapang nung India nunger angopurtemji apuba sülen tapet ketdangsertem ket nung

agütsüogo, ta parnokisa metetdaksü.

Tan hopta tetenzüklen Colombo nung aliba Indian High Commission-i, Sri Lanka nunger tzüyim nung ozüing alema ango apuba atema India nunger 41 pua liasü; parnok ajak India-i meyipa yokogo, ta metetdakja liasü.

January 12 nüa Sri Lanka Navy temi India nunger angopur 8 den rong ana pua liasü.

Mapang shia India aser Sri Lanka nunger angopurtemi ozüing alema arrtsü adener ango apuba ajanga India aser Sri

Lanka tsüingda tesendaktep-a raksar.

Taoba mapang Palk Strait nungbo Sri Lankan Navy sepaitemi India nunger angopurtem dak injang-a khalokja liasü.

Palk Strait ya Tamil Nadu aser Sri Lanka na tsüingda tzüyim nung arrtsü lir; iba tesem nung linük anaprongla nungi angopurtemi ango kanga apur. Ajisüaka linük anaprongla nungi angopurtemi memeteti tzüyim nung arrtsü adena aoe.

2024 küm kija nunga Sri Lanka Navy temi India nunger angopur 529 pua liasü.



January 26, 2025 nü Dehradun nung Republic Day anogomong sentong nung Uttarakhand Angh, Lt. General Gurmit Singh (retd.) aser Chief Minister Pushkar Singh Dhama na adenba noksa nung angur.

Elections junga agitetba atema Jharkhand nem sempet agütsü

New Delhi, Aenjeti/January 26 (Agencies): Yaküm Lok Sabha elections aser assembly elections junga ketdangsüa agitetba atema Honibarnü (January 25) Jharkhand state nem “best-performing state” award agütsüogo.

Jharkhand nung chief electoral officer (CEO) office ajanga, elections junga ketdangsüa agitetba atema tang mezüing state-i iba sempet angur, ta metetdaksü.

Honibarnü New Delhi nung National Voter’s Day anogomong sentong ka nung linük Tir, Droupadi Murmu-i Jharkhand CEO, K. Ravikumar nem iba sempet agütsü.

Elections junga agitetba atema Ravikumar-i state nung voters ajak, booth-level officers (BLOs), polling ketdangsertem, police officers, security sepaitem, yimtenren party tem aser osangbenertem nem tenüingsang agütsü.

“2024 küm Lok Sabha aser Assembly elections kanga junga

tesünep nung agitetba ya election dak sendakba maparen nung shilem agir stakeholders ajanga lir. Asenok ajaki longjemer inyakba ajanga tanü state-i iba sempet angur,” ta pai ashi.

Jharkhand CEO office ajangasa, yaküm Lok Sabha election aser Assembly election mapang nung maparen tasen aika apiteta inyaka liasü, ta metetdaksü.

Jharkhand nung voter list revision maparen nung aibelen malitsüsa inyak aser iba maparen kübok BLO-i voters ajak ki aiben semdanga parnok kidang stickers malokja liasü.

Ano voters list nung tasenpurtem züngoktsü atema PVTG (particularly vulnerable tribal group) atema temeja sentongtem agia liasü.

Iba dak alia Maoists telungpurtemi timtem agütsüba tesemtem nung tang mezüing voter temi kecha timtem majurui vote agüja liasü, ta CEO office ajanga metetdaksü.



January 26, 2025 nü Amritsar anasa Attari-Wagah arrtsü nung Republic Day amongdang Border Security Force (BSF) sepaitem nanglong lemsatapa achidang tangokba noksa nung angur.

Jan 27 nungi Uttarakhand nung UCC benoktsü: CM Dhama

New Delhi, Aenjeti/January 26 (Agencies): India nung Uniform Civil Code (UCC) ozüing mezüing benokba state ji Uttarakhand akümtsü.

Amongnü Uttarakhand Chief Minister, Pushkar Singh Dhama-i, January 27 nungi state tesem ajaklen UCC ozüing benoktsü, ta metetdaksü.

Dhama-i X ajanga, “January 27, 2025 anogo nungi state nung Uniform Civil Code (UCC) ozüing benoktsü aser ibaji ajanga independent India nung iba ozüing mezüing benokba state ji Uttarakhand akümtsü,” ta metetdaksü.

Ato kilonser, Narendra Modi-i Uttarakhand state semdangtsü anogo ka jakdang state nung iba ozüing benoktsü.

Dhama-i, Uniform Civil Code benoktsü atema iba Act kübok ozüingtem agizükba aser ketdangsertem nem training agütsüba densema maparen ajak renemogo, ta ashi.

“UCC ajanga loktiliba nung ajak liromedemtsü aser senso ajak nem kasa temeden aser kasa teinyaktsü khuret agütsütsü,” ta paisa metetdaksü.

Kodang Uniform Civil Code ozüing benokdir iba ozüing ajanga ST nisungtem dak alaka state nung nisung ajak alentsü. India temzüing nung Arrla 342 aser Arrla 366 ajanga Scheduled Tribes nisungtembo iba ozüing kübok maitdaksür.

Uttarakhand Uniform Civil Code nung Arrla 392 tashi lir aser itemji shilem pezü aser chapter tenet lemsaa lir. Item Arrla nung kasa temeden, talisa kiojen, kiyimba aser balalulaba densema onük aika nung tetsürtem nem kasa temeden agütsür.

UCC kübok tebur kati tetsür ka dak tali agiba nokdang, teburtem kibong akümtsü atema arrshi küm ishiba agia küm 21 aser tetsürtem küm ishiba agi 18 latetja lir. Iba ozüing kübok kibong akümtsü atema-a registration agitsü.

Ano kibong mekümi ki ka nung külemi apuani ama alirtemia sorkar matsüingdang register asütsüsa akümtsü, aibelenertem dang senchi 10,000 achitsü mesüra ita asem tashi tepuokdak ayutsü; mesüra temerenshi anaprongla agütsütsü akok.



TIR YIMYIM YIMOBILEM (EDITORIAL)

DIMAPUR TENTONÜ, JANUARY (AENJETI) 27, 2025

Temzüng koma lir ?

British yimten yimli talenba kübok nungi India salar külen, India nungertema yimten nüchiso akaba linük kümteta, pei nübertem dak apetba temzüng ozüng latet aser iba temzüng ozüngji mapa kuma aotsü sangdongba anogo, 1950 kum January 26 nungi yashi tashi nung 76 ben monga aruogo. Atangji, linük asoshi ibaiang shitakba yimten nüchiso anguba anogo amai lir, kechiyong 1947 kum August 15 anepdang India yimten nüchiso anguba osang sangdongaka, linük kaji la meyong temzüng ozüng ka lateta melira, ki renemyonga mesemteta mai amai liasü. Atangji, India ama alima tulu, kin-kidong aser oshi-oben balala zünger mezüngmatsüsa meyoktepa alidak, tereprangtsü, abensüoshi, achiajamba yimyatem dang masü saka ano tamangba yimsü aser sobaliba tapu balala beshir jenti aliba lima nung item ajakji ayimjema yimsü asütsü atema yimten temzüng ozüng ka latettsüba mapaji temela masü. Ajisüaka, India nung, talisa kin kidong aser lokti tilatemi moa, teküpbok jenjang nung alir kin tila nungi süaka, Dr.B.R.Ambedkar-i anir linük temzüng yangluba agi India temzüng agi India nung kin tula aser tamangba yimsü balala rongnung kecha tebandang mali, India nung senso ajak nem pei sobaliba beshitsü aser tanela jenjang asoshia pei amangnüba yimsü amangtsü aser sayutsü temeten agüja lir. Iba temeten jagi, kin kidong tapu balala aika liaka, linük temzüng kübokbo India nung senso ajak kasa dang ser tetsübu aser tarendak kecha melii sademsadema pei sobaliba beshitsü aser pei amangnütsü amangtsü temeten aser maangka tulu agüja lir. Aji oda, kum shia January 26 nü ' Republic Day' amungba nükjidong ya 1950 kum kasa anogo nung latetba linük temzüng to tanüa shitak beshia aoer asü maor ta reprangshia jembiba aser akangshiba anogomung lir. Anungji, iba anogomung nung government-i nübertem asoshi inyaktetba aser inyaka aotsü aliba sentongtem nübertem den lemsateptsübajia tongtibang, ajisüaka iba dang nung jagi tongtibangbaji linük nung yimteni temzüng ozüng shitak amshia nübertem madak yimsü asür asü masür ta meyipa reprangdanga jembitsübaji lir. Ibaji kodang bilemdangdir, tanü India tesem aika nung 1950 kum latetba linük temzüng ajembanga yur, India nung tamangba yimsü pei amangnütsü mamangtsü aser chiyongtsüa dena pei chinütsübo mechitetsüsa tesem aika nung atalokba angur aser angashir. Item tatalokba aika rongnung, tang Republic Day amongtsüba mapang nunga dena Uttar Pradesh kübok Amdedkar Nagar district nungbo Khristar arogo ka nung sannüker Jose Papachan aser pa kinungtsü nati parnok alidak teküpbok jenjang nung alirtem den Tsüngrem temeim lemsatepa inyakba mapatem anema okadak mamangba purtemi benokba ken o angadanger, obendangertemi tenaji kum pungo tepuokdak ayutsü atema obendang agütsübaji asütsü. Iba temerenshi denji külemi tena nisung shia dang senchi sena meyirijang metsür pungongo chiogo. Tena ya Kerala nungi lir aser sannüker Jose yabo 2021 kum-a Bihar nunga Tsüngrem temeim lemsatepa jajaba atema kanga mejungi azükba lendong nungi kumzükba Tsüngremer tenyar ka lir. Tena amaji India nung tanü Khristan-temi mamangba purtem den Tsüngrem temeim lemsateptsü makoker aser India nungertemi pei amangnüba tamangba yimsü amangtsü makoker. Aji oda, India temzüng nung India senso ajak nem pei amangnüba tamangba yimsü amangtsü temeten agüja liaka, tesem aika nung limapurtem shinga Khristan akümtsü memelar aser Khristan-tembo Khristan yimsü toktsür Hindu yimsü amangtsübo menokdang. Iba amaji, chiyonga ajemba sobaliba nunga India tesem aika nung nashishi ayoktsü aser achitsü memelar. Iba ama India yabo 1950 kum January 26 nü nungi amshi tenzüksü India temzüngi latettsüba aser aginüba India masü, India balaka kumogo. Aji oda, India ya temzüng ka kübok longjemer yimjung nung lidi süra mezüng temzüng yanglurtem tangatetba aser mangdang atalokdakja yimsü asütsü kanga nungdaka kumogo.

OLEMSABANG

TENÜNGSANG AGÜTSÜTETSÜLAASER AGÜTSÜTETSÜSA-JI LITETSÜLA

- Tinuniken, Mangkolemba

Tai dang aputsü ata melei tenungsanga mapa tajung asoshi agütsütsüla aser mapa inyakertemia tenungsang menungnangi agütsütsüsa kechi mapa sudir suang ochi shia pei nebur aser pei lima atema inyaktetsü/jembitetsü nungdaker.

Tanu asen lima nung tenungsang agi anunga lir. Tetezü tajung dang tajung tamajung dang tamajung ta shiteter mali. Tsüngremi-a tenungsang aginua alinung meimchir-e Koda sur tenungsang maginutsüba. Neburtemia koma inyak-dir jembitetsü ta dang ata melei pei akokba agi shilem agia nungitsüla.

Government Higher Secondary School Mangkolemba Tzüdayong ward ajanga senzusenpong asür. Kumsa Küm aginua aliba black topping Community Health Centre tashibo neburtemi tenla saruteper 1km shi neburtemi yoker aliba(Sorkari masü), yaküm 2024 December nungi tenzüka medical aser Government Higher Secondary School tetsüngda Koba 1.50km ka shi asütsü aji dang teinyakdak lir. Asangsang asü pungpang tasa bilemer, tsü-a! onoka, Government Higher secondary School shisashirtem aser stafftem blacktopping nung taküm 2025 nungibo jajatsüsa liasü-a na ta asangsang nung angudang ya shidakba na ta pelaseter. Saka tetsübuba ka lir tesadandang inyaker meinyak nungbo ta Kechiyong Nagaland nung projectem aieka tesadandang inyaker meinyaki lir.

Kumsa Küm ward yimteni achayanga ward nung aliba neburtem-i Küm 30/40 tashi timtem jenti agia iba leman yanglua aruogo. 7th November 2021 kesa osang kakat nung iba leman atema agüja tazüngertemibo meteta alitsü aser bilema arutsü sudi.

Mezüngbuba blacktopping iba leman nung yoker. Minister TEMJEN IMNA ALONG LONGKÜMER dang kangasa pelar aser tajungtiba nung iba maparen tempangdaksütsü pa aser par telok danga mepishir. Paisa Model college Mangkolemba bener arutetba aser college Bus tasen ka agütsüba ajanga college aser Government Higher Secondary School nung azünger anaprongla nem tajangzük tulu agütsüdar, pa nem konang tetushi agütsür. Tarutsü nunga pa ajanga mapa tajung bener arua inyaktetsü yimla-a atar.

Neburtem talisa ward nung alirtemi aser School nung sendaka alirtemi akokba leman ajak nung yariteptsü tangatetba tajung dang amai maneni alitsü aser shidakbaji inyakdaksütsü tangatetba ulushitsü mepishir. Kechiyong kodangang tanaben iba project arutsü memetet. Putu ka nung ken arua yanglutsü tenzüka inyakdang project tempanga inyaktetsüsa ajaki shilem tajung agiangma. Teinyakertemia iba tangatetba nung leman yangluzükli meraksatsüsa inyakdaksünur. Kechiyong asen lima nungbo mapa matemdangsa tetenzüklen tesembo raksadokbasa angur.

Neburtemi aser teinyakertemi am-alitepa tajungtibaji asütsü ochi nung maparen tatem tashi tempangtetsü tangatetba asenok ajak dak lidima.

Contract mapa ta sur dang meyutsüi neburtemia lemanji sorkar jajatsüba masü nebur jajatsü alinung contractor dak akokba tashi nungitsüla aser contractor-ia pei ajangzükkerbo ojang ta mangateti shidakba DPIR nung aliiba ama nebur-a aser pa ajangzüktsüsa tangatetba ulushia leman dang masü maparen ajunga nung inyaktetsü/jembitsü akanger.

"Sorkar-ji nebur aser nebur-ji sorkar" Ajak dak iba tangatetba ali nungbotanü asen Naga lima iba tia mekümla.

Angateta aliyonga mapa agi mesayuter. Metetsenmonga kija, lokdi ajaki aibelener. Temelungjangibo aitsür tepang agi ola adoka maitsüetba nebur ka masütsü Küm Küm shia lidi. Na aser ni yangluba ozüng naisa nisa raksatsüsa aliba yimya indokdi, tanu ni ajangzükkerbo ta asüba tangatetba nungi piladima.

Marani nungi Mokochung leman blacktopping meyokzük dang rasakba ajaki asangsang nung ngua lir saka ochi ola madokteter.

Ken jungjunga suoki yia bilemdanger temulungjangi aitsübatem maparen ajak anema yim yim ola adoka kumküm shidi.

Asen Naga lima maparen ajunga nung ochi lao-a aliba ya shibaisa mesonur. Pei sasa pei tamasaba nung mesodi aser ochi nangri kangloker lokdi balala mesoyonga aotsü züngsem ka ka kumdimma.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Uttar Pradesh nung pastor ka aser kinüngtsü na jail nung puoktsü



Pastor Jose Pappachan aser pa kinüngtsü, Sheeja na noksa nung angur.

January 26, 2025: January 22, 2025 nü Uttar Pradesh nung anti conversion özüng kübok Pastor, Jose Pappachan aser pa kinüngtsü, Sheeja na küm 5 tepuokdak ayutsü obendang agütsüba den külemi tena dang senchi 50,000 achi.

Ambedkar Nagar Sessions Court nung Special Judge, Ram Vilas Singh-i Uttar Pradesh nung anti-conversion özüng kübok tena aitsü saka SC/ST Act kübok tena anema benoka aliba ken o nungbo maitsü.

2023 küm January 23 nü BJP district secretary, Chandrika Prasad-i pastor aser pa kinüngtsü na anema ken o benoka liasü.

Madhya Pradesh nung Pipariya kübok Bank Colony nung alir pastor aser pa kinüngtsü nati Shahpur Firoz yimdak Dalit nungertem Khristan yimsü dangi meyipdaksütsü merang, ta tena anema ken o benoka liasü.

Ken o angadanga aruba mapang nung nisung 11-i pastor aser kinüngtsü na anema kuli agüja liasü. Pastor aser kinüngtsü nati kibongtem sema senzü aser yimdak Vifla'er kidang nisungtem ayongdena Lai tesayuba agüja liasü. Tenatisa parnok dang yi majemtsü aser meraratsü sayutsüngia liasü, ta parnoki metetdaksü.

Kulisür rongnung ka Lovekush-i, apuani na jagi yimdaklirtem adenshidaksüba sülen shisatsü aser tanurtem shisaliok dak sendakba nung o lemtepa liasü, ta ashi.

Manju aser Roshni natia, apuani nati Laishiba lema agütsü, ajisüaka tena tesayuba tongtibangbaji taküm junga alitsü aser yimjung nung alitsü sayutsüngiba liasü, ta ashi.

Khristmas mapang nung tenati yimdaklirtem nem chiyungtsü lema agütsü, ta parnokisa metetdaksü.

Police-i pastor Jose'er kidang nungi tanurtem atema adokba noksa keta aliba Laishiba ka, diary kaket pezü aser Yisu Khrista noksa keta aliba calendar pezü apu.

Pastor atema ken o jembitsürtemibo, yimsü dak sendakba kakettemji sarasadem sentongtem nung amshitsü atema lir, aser linük temzüng ajanga yimsü benshitsü aser külemtsü atema temeden agüja lir, ta ashi.

Pastor Jose Pappachan-i 2022 küm October ita nungi Uttar Pradesh nung evangelical mapa tenzüka liasü, ajisüaka tawa court nung ken o angadanga aruba mapang nung pa high blood pressure agi shiranga hospital nung among. Pa kinüngtsüa January 18 nü police-i apu.

Court-i, anti conversion özüng kübok shisaliok aser teyari balala agütsübaji mesüzükba lir, ta shia tena anema obendang agütsü.

Ken o angadanga mapang nung pastor atema ken o jembitsürtemibo, Laishiba lema agütsüba, yi majemtsü ajungshiba mesüra sayutsüngibaji özüng alema aibelen masü, ta ashi ajisüaka court-i anti conversion özüng kübok tena aitsü.

Pastor aser kinüngtsü nati North India nung Tsüngrem tenzüksü atema Kerala nung par ki toktsür apusoa liasü.

ANOGO ABEN TSÜNGREM DEN

Talila Talubusa

Tang, asenok dak inyakba ain amato, shibai asenoki asüngdangba aser bilemba ajak dang kanga tali inyaksü akoker. Efesa 3:20.

Tsüngrem asoshi aser Pa arogo asoshi mapa meranga inyakba agi asenoki Tsüngrem peladaksür ta bilemer. Aji saka Tsüngremi nisung tesüngmangtsü ka yangluba nisung tejangraba agi Pa peladaksür (T.Ken 8:3-4). Tsüngremi na ajanga inyakba mapa dang nungi tuluba nai ne sasa ne alizüng ayutsü makok. Tangar dang nungi tali Tsüngrem peladaksütsü asoshi Tarsus nung Saul mapa tangar dangi tali pai meranga inyak, saka pai meranga inyak nung Tsüngremi pa taküm asoshi inyakba den medemdang dang pa mapaji jana rüja dang liasü ta pai bushitet. (Fil. 3:7-8).

Asenok tebilemstüji aseni yangluba sentong nunga aseni melamela jangratemer. Asenoki tamaren mapa inyaksü merangra asenok taküm nung tashi teperi akatsüla, iba jagi Tsüngremi asenok dang pelatsü ta bilemer. Tsüngrem nungi tajaba asenoki mangashi tashi asen taküm indang asenoki nükla dangi arutsü makok mesüra Tsüngremi asenok ajanga ataloktsütsü taaka bilemstü makok.

Asenoki bilemba dang nungi Tebui Pa aini asen tashi mait atendanga oa angur ta asenok sasa bilemtetsü tenüngdaksü lir. Asenoki asen tebilembaji tesülen yutsütsüla. Asenoki asen pungmangtem nung temulung süa malitsüla kechiaser itemji kechi koma jangratemtsü südir süang teti atema masü. Kodang asenoki Tsüngremi tuyuba nung odir asen taküm nung Tsüngrem mapa inyakba aseni metetsü aser ibaji Pa tashi ain dena aliba ajanga dang rasaa ashitsü akok. Ajak nung asenok koda temulung süa alitsü?

World Communion of Reformed Churches nung lenir, Kirkpatrick süogo



Clifton Kirkpatrick

January 26, 2025: Taoba mapang Presbyterian Church (USA) General Assembly nung lenir aser World Communion of Reformed Churches nung Tir, Clifton Kirkpatrick alima nungi pilaogo; pa arrshi küm 79 liasü.

Honibarnü (January 25) pa Columbus, Indiana nung aliba Four Seasons Retirement Community nung lia asü; pa nungtem nung memorial sentong March ita nung Louisville, Kentucky nung aliba Strathmoor Presbyterian Church nung agitsü, ta Presbyterian News Service (PNS)-i metetdaksü.

Kirkpatrick kinüngtsü, Diane Worthington-a yaküm March ita nung asü.

Pai aianu ka, chirnur ana aser semchir 5 toktsür asü.

Taoba mapang PCUSA nung clerk, Rev. Gradye Parson-i, "Cliff Kirkpatrick ya nisung tajung ka liasü. Pai kü dang pa den külemi inyaksü atema asüngdangba anogo nungi Tsüngrem Arogo atema pa dak tangatetba tajung aliba ni meteta liasü," ta ashi.

Pa ya 1945 küm May 1 nü Harlingen, Texas nung aso. Pai Dallas Council of Churches, Fort Worth Council of Churches aser Houston Metropolitan Ministries densema Arogo organization aika nung inyaka aruogo. Tatemsa pa World Council of Churches executive committee nung liasü.

Pa PC(USA) Worldwide Ministries nung Director inyak aser 1996, 2000 aser 2004 kümtem nung kümsük pezü

Clerk inyaka liasü. Pa Louisville Presbyterian Theological Seminary nunga Professor inyakogo.

2004 küm World Alliance of Reformed Churches nung pa Tir shima liasü aser 2010 küm tashi Tir inyak. Tangbo iba nungja 'World Communion of Reformed Churches' ta melenogo.

WCRC Interim General Secretary, Setri Nyomi-i sangdong ka ajanga, "Kirkpatrick ya medemer tajung ka liasü. Pa dak pastoral sempet aliba ajanga kü tenzüka wadang nung kanga ajungmesoogo," ta ashi.

2005 küm interview ka nung jembidang Kirkpatrick-i, "PCUSA jenjang mejungi kümogo, kechiyong asenoki Tsüngremi asenok dang nungi imlaba ama asenoki wadang meinyaker," ta metetdakja liasü.

"Tayongzüka tulutibaji, asenoki Yisu Khrista tiyongtsü südaksütsüla aser Khrista nung temang ka ama asenok kati ka tenzüktepsüla," ta paisa lemsatempa liasü.

"Yisu ya asen tesünep, temerük aser telongjem lir. Asenok ajak kasa masü, ajisüaka Yisu Khrista ya aser Kibuba aser Kümtetdakba ta amangba nung asenok longjema lir," ta pai ashi.

Christian Council of Korea-i South Korea nung WEA GA ashishir

January 26, 2025: January 17, 2025 nü taoba mapang World Evangelical Alliance (WEA) nung züngsema aliba Christian Council of Korea (CCK)-i sangdong ka ajanga taküm October ita nung South Korea yimtiba, Seoul nung WEA General Assembly (GA) ayongzüka ashishia metetdaksü.

WEA General Assembly ya Sarang Church nung akatsü. CCK-i Sarang Arogo dang nenoki senotsü agi WEA yaribaji teladak asütsüla, kechiyong nija aser organization kar tajanzük ngudaksütsü atena tenla amshira ibaji Arogi aiabelener asütsü, ta metetdaksü.

Yaküm November ita nung WEA-i taruba General Assembly ji South Korea nung akatsü, ta sangdonga liasü.

WEA General Assembly ya Seoul nung taküm October 27-31 anogotem nung ayongzüka akatsü. South Korea nung Khristan telok aikati GA anema ola adoker. Iba sentong ya mimshia renemba lir, kechiyong iba sentong renemdang South Korea nung aliba Khristan tentettem nungi züngsemtembo mejaok, ta parnoki metetdaksü.

Korea nung aliba Arogo

karibo, WEA nung lenirtem theological tangatetba nung tashishitsü kar lir, anungji General Assembly metenzükdangyongi itemji tama bentetsüla, ta akhanger.

WEA nung regional 9 aser national Evangelical Alliances 143 densema lir, aser affiliate züngsemtem rongnung international denominations aser ministries densema lir.

Ita ishika tejaklen pastor tem, deacon tem aser professors 1,000-i, "Reasons Why the Korean Presbyterian Church HapDong Cannot Engage with the WEA" ta ser ocet ka sangdonga liasü.

Parnoki WEA lenirtemi Pope aser World Council of Churches den tesendaktep tajung ayuba ashishiba den külemi Muslim lenirtem den-a tongtepratepba ashishir.

CCK Tir, Rev. Seo-young Jeong-i, South Korea nung WEA GA ayongzüka akaba ajanga Korea nung aliba Arogotem tsüngda ano telemsa taliba adoktsü, ta metetdaksüogo.

WEA indang theological tangatetba mejangja tashibo Korea nung WEA GA ayongzüka akatsü alibaji thinena liang, ta Arogotem aikati akhanger.

AO OSHI ANGAZÜKDAK:

TANÜ ANGAZÜKTSÜBA OJANG



Tebuja

(n) tangar ka pei tebu kümdaktsüba (adopt as one's own father)

* Tetsür bendanger kiyii aodang tebuja ka bushitsü nüngdaker.

Tebulen

(n) obala tsütsü senmangtem (paternal)

* Ozü tebulen nisung tajung aika lir.

OLONG PAITEP # 7047

| | | | | | | | | | | |
|----|--|----|--|----|--|----|--|----|--|---|
| 1 | | | | | | 2 | | | | 3 |
| | | | | | | | | 4 | | |
| 5 | | 6 | | | | 7 | | | | |
| | | | | | | | | | | |
| 8 | | | | | | | | | | 9 |
| | | | | | | | | 10 | | |
| | | | | 11 | | 12 | | | | |
| | | 13 | | | | | | | | |
| 14 | | | | | | 15 | | | | |
| | | | | | | | | | | |
| | | | | | | | | | | |
| | | | | 16 | | | | | | |

TIPIEN

- 1. O jembitsü tashi - 8
- 5. Süngjang tapu ka - 5
- 7. Tekanük nung enokba - 5
- 8. Teka amtep - 5
- 12. Tzüc asendak - 5
- 14. Tsünpang tema aliba - 5
- 15. Ken atenba yimya - 5
- 16. Asangur - 8

LANGTSÜNGLEN

- 1. Tepok telung nung shilem ka - 7
- 2. Tamajung aküm - 5
- 3. Chi den külemi achiba - 3
- 4. Meimchir alimai aruba - 3
- 6. Laishiba nung ayong ka - 4
- 9. Tarutsü nükla - 7
- 10. Tamendakdak/Nükjidong - 4
- 11. Tenük-telen mejungi aküm - 5
- 13. Terok nungi adokba - 3
- 14. Meimchir telemasa - 3

OLONG PAITEP # 7046 TELANGZÜBA

TIPIEN :

- 1. Taa, 3. Teküm, 6. Aibelen,
- 7. Aut, 9. Ajizük, 10. Ojala,
- 11. Semer, 13. Sen, 15. Kiochtsü,
- 17. Itsük, 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua,
- 5. Mitsüktsü, 6. Azübenshi,
- 8. Lah, 9. Jangkok, 12. Akok,
- 14. Nashi, 16. Sür.

NAI-A YA METETTER MA



Sri Manakula Vinayagar Engineering College (SMVEC) ajanga "largest human Ashoka Chakra" otsü tasen ka yanglutetogo. SMVEC ya autonomous institution ka lir aser kaketshir 5,000 temai 24-spoked Ashoka Chakra ka yanglua liasü. Iba ya yimjung, terenlok aser telongjem tamaitüsü yangluba liasü aser World Record Union ajanga iba otsü agizükogo.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Vanlalfelpuia Royte nem NE Young Entrepreneur Award agütsü



Hotel Taj Vivanta, Guwahati nung Bollywood star Sharman Joshi-i Vanlalfelpuia Royte nem sempet agütsüdag agiba noksa ka angur.

Aizawl, January 26, 2025 (Agencies): Times Group and Partners ajanga North East Consultancy Services (NECS) proprietor & Chairman Vanlalfelpuia Royte nem NE Young Entrepreneur of the Year Award 2024 agütsüogo.

January 24, 2025 nü Hotel Taj Vivanta, Guwahati nung 2 buba NE Times Business Awards Ceremony alidang Bollywood star Sharman Joshi-i Vanlalfelpuia Royte nem sempet agütsü. Northeastern state asem-Mizoram, Meghalaya, aser

Nagaland nem technical support aser consultancy services agütsüba atema Royte nem iba sempet agütsü. NECS ajanga pai iba maparen inyakba den Aizawl Football Club asoshi shilem tulu agiba ajiteta iba sempet agütsüogo.

Dibrugarh ya Assam nung tanabuba yimtiba asütsü: CM Sarma

Guwahati, January 26, 2025 (Agencies): Taruba küm asem tsüngda Dibrugarh ya tanabuba yimtiba kümdaktsütsü ta Assam Chief Minister Himanta Biswa Sarma-i ashi. January 26 Republic Day sentong nung jembidang CM Sarma-i iba osang lemsatsep. Dibrugarh nung Republic Day tenüng nung linük wako salatsüdag CM Sarma-i iba yimti nung teti atema Assam assembly ki ka yanglutsü ta ashi. "Dibrugarh atema tanü ya tongtipang anogo ka lir kechiyong Assam nung

tanabuba yimtiba akümstü. Tang mezüng atema iba putiotsü yimti nung state celebrations agir" ta CM Sarma-isa metetdaksü. 2027 nungi kümshia Dibrugarh nung Assam assembly indang session ka agütsü ta paisa shisem. "Sangküm January 25 nungi Assam assembly indang permanent building indang mapa tenzüktsü. Taruba küm asem tsüngda Dibrugarh ya India nung tongtipang yimti ka akümstü" ta Sarma-i metetdaksü. Assam sorkar indang urbanisation plan nung

Dibrugarh den külemi Tezpur aser Silchar renlokdaktsütsü ta paisa ashi. "Onoki Tezpur nung Raj Bhavan ka yanglutsü aser Assam nung sobaliba yimtiba kümdaktsütsü. Silchar nung secretariat ka aser chief secretary indang office ka amenoktsü aser iba ajanga Barak Valley o Guwahati tsüngda ongdang melidaktsütsü" ta Sarma-isa ashi. Assam nung mezüng atema state yimtiba adena orr Dibrugarh jila nung CM secretariat ka amenokogo ta paisa shisem.

Tripura nung R-Day jakdang Bihar nunger ana apu

Agartala, January 25, 2025 (Agencies): Republic Day jakdang Tripura Police-i Dharmanagar Sub-division nung Bihar nunger ana ketnung pistol ka bena aliba apu. Tripura Police, District Intelligence Branch, aser

Dharmanagar Sub-divisional Police Officer külemi mita aodang tena apu, ta North Tripura District Superintendent of Police, Avinash Rai, IPS-i ashi. Tena ya Niraj Kumar aser Indar Mukhia na lir aser

tenaprong Bihar nunger lir. Tena train nung aruba sülen mita repringdang pistol ka ngutet. Iba dak sendakba nung bushisüngdang ka tenzükogo aser police-i tena okadaki anir oa ken o benoktsü.



76 buba Republic Day nüngtem nung Business Association of Nagas (BAN) ajanga January 26, 2025 nü District Hospital Dimapur semdanga iba mozüki nung shiranga munga alir aser ketdangsür nem sempet agüja liasü.

Office Of The
MAREPKONG YOUTH ASSOCIATION

METETDAKTSÜR

6-Buba Mokochung Inter Ward Football Tournament 2025, March 25 anogo nungi tenzuka asayatsü. Iba den sentakba nung February 20 nü nungi Registration form, Cyber 48 first floor MMC Shopping Complex nungi angutsü.

Form meyeptsütsü atema tatembangba anogoji March 8, 2025 alitsü. Talila osangtsüsang metetpelatepnera agüja aliba contact: +91 8837074988 / +91 8131860808 den jembiangma.

Sd/-
**Takalong
President**

Sd/-
**Temjenwapang
General Secretary**

Israel-i south Lebanon nung nisung 3 tepset

Beirut, Aenjeti/January 26

(Agencies): Ceasefire tenangzüktepba kübok Israel nungner sepaitemi atsüngintsüba anogo south Lebanon nung Israel nungner sepaitemi nisung asem tepset aser nisung 31 yirutsiügo.

Lebanon indang Ministry of Public Health-i Deobarnü ashiba agi, Israel nungner sepaitemi arrtsü nung aliba jila ana nung nüburttem dak injang khalokja liasü. Lebanon nungertem ya parnok yimtsüngtemi meyipa aotsü merangba mapang iba lendong ataloka liasü.

Israel indang military otongdar Avichay Adraee-i Deobarnü, south Lebanon kübok yimtsüng 60 nung alirtem dang parnok meyipa marutsü atema osang ka agütsür liasü.

Israel nungner sepaitemi item nisungtem tepsetba ya November ita ceasefire atema nangzüktepba nung aibelen ka lir. Iba tenangzüktepba kübok Israel nungner sepaitem Lebanon nungi Deobarnü 02:00 tashi nungbo atsüngintsü nangzükteper liasü.

Israel Ato Kilonser Benjamin Netanyahu-i, par sepaitem menomeyanga mainshiba ya Lebanon dak tai tongloktsügo aser ashiba agi, Hezbollah pur arrtsü nungi temulung süa matsüngini lir. Lebanon-i iba

taitüsüba ya magizüker aser Israel dang atakzuka aliba ama inyangshitsü mepeshia metetdaktüsügo.

AlJazeera correspondent Zeina Khodr-i southern Lebanon nung Borj al-Mlouk nungi ashiba agi, Israel military-i parnok ano mapang tatsüka atemabo mainshi-i alitsü nungdaker ta bilemer, kechiyong Lebanon army-i Hezbollah pur mazüokteter aser parnok indang military infrastructure tem loksar mainshidaktüseter.

“Israel-i ashiba agi, iba tesem nung Lebanon nungner sepaitem mali aser Hezbollah pur ano mainshi-i lir. Ajisüka iba osang ya mejangja,” ta lai ashi.

Tenangzüktepba kübok Lebanon south leni United Nations peacekeepers den Lebanon army yoktsü aser Israel nungner sepaitem anogo 60 tsüngda ainshitsü nangzükteper lir.

Hezbollah-i parnok sepaitem arrtsü nungi km30 shi pilar Litani ayonga adena anintsü aser iba den south nung tanungba military infrastructure tem loksatsü mulunga agizükoggo.

November ita United States aser France na teyongtsü ia tenangzüktepba yangluba sülen Israel aser Hezbollah na küm ka dak tema rara aliba anendakja liasü.

DR Congo nung telungpurtemi bendanger peacekeeper 13 tepset

Kinshasa, Aenjeti/January 26

(Agencies): Democratic Republic of Congo nung peacekeeping forces den inyaka aliba sepaitem 13, M23 telungpur telok den khatepba mapang tepsetogo.

South African military yagi ashiba agi, telungpurtem ya Goma yimti tonga marudaktsütsü atema nokdakba mapang parnok sepaitem teku aser Malawai nungner asem aser Uruguay nungner ka tepsetogo.

France tir Emmanuel Macron-i ashiba agi, azütokshi anendaktsütsü atema alima kintemi ayongzükba mapang pai DR Congo aser Rwanda nungi lenirtem den sensaksemoggo.

United Nations-i, Goma yimti nungi non-essential staff ajak anindar, kechiyong rara tamajungba küma odar.

Iba mepetmesü dak sendakba nung UN Security Council senden ka Hombarnü amentsü liasü saka Deobarnü menoggo.

M23 telungpurtemi Goma nung amenoker aliba Congo nungner sepaitem dang azütokshi nungi pila alitsü atema bendaga agütsütsü ayongzuka liasü. Linük nung sorkar anema telok

balalai nokdakba atema DR Congo-i kidanger Rwanda dak tai tonglokja diplomatic tesendaktep ajak raksatsügo.

M23 telungpurtemi Brehostibarnü Congo nungner military governor ka tepsetba sülen iba lendong ya ataloka liasü. January it tetenzüklen parnoki linük anütoklen Minova aser Masisi ta jila tongtibang ana atsünga liasü.

Kasa mapang nung EU indang foreign policy tekolakba Kaja Kallas-i, M23 telungpurtem dang parnok inyakyim anentsü mepeshiba den iba telok nem teyari agütsüba atema Rawanda aija liasü.

M23 aser DR Congo army na tsüngda taküm küm tetenzük nungi raratepa arudar aser telungpurtem yagi taoba mapang dang nungi tang tesem timba atsüngoggo.

Iba mepetmesü ajanga taküm nisung 400,000 dak tema pei talidak ki toktsür jenshioggo, ta US-i ashi.

Local lenirtemi taoba hopta ashiba agi, M23 puri azüoker aliba tesemtem nung civilian 200 dak tema tepsetogo aser Goma nung mozükitem nunga nisung noklang aika temang anepaludar.

South Korea Tir Yoon Suk Yeol anema ken o benokoggo



Yoon Suk Yeol

Seoul, Aenjeti/January 26

(Agencies): South Korea Tir Yoon Suk Yeol-i linük nung martial law benoktsü merangba sülen sorkar anema inyakba nung “ringleader” ka ama liasü ta prosecutor temi Deobarnü (January 6) ken o benokoggo. Pai iba mapa inyakba yong khen atema tir mapa nungi anenja tepuokdak yua liasü.

Democratic Party odongtar Han Min-soo-i ashiba agi, “Sorkar anema nokdakba nung tanir asü ta tai tonglokja alisang Yoon Suk Yeol anema ken o benoktsü prosecutor temi telemteba agiogo.”

“Sorkar anema nokdakba nung lenir asüba atema temerenshi tang tenzükter,” ta paisa ashi.

Taoba hopta anti-corruption investigators temi longkak sashia aitba sülen tai tonglokja aser mapa nungi anentsüsang aser tang tepuokdak yua alisang tir anema ken o benoktsü shia liasü.

Yoon ya pua January 15 nungi police ket nung lir, anungji South Korea tir teinyakdak apur mezüngbuba akum. Ajisüka Yoon indang okatsür temi pa pua ayuba ya ozüng alema lir ta ashi aser tangshia chiokang ta

takhangba agüja liasü.

South Korea nungner tir anema ken o ishika mebenokteter aser item rongnung sorkar anema nokdakba ya ka lir. Iba mapa inyakba nung temerenshi ya takum tepiyong tepuokdak ayutsü mesüra tasüba agi merenshitsu. Ajisüka South Korea nung küm aika tasüba temerenshi mamshi arur.

Taoba hopta court ka nung ken o jembiang Yoon aser par okatsür temi tang tir mapa nungi khen atema anenja alisangi kodanga linük nung martial law ajak benoktsü tebilemba meliasü ta ashi. Ibai yimtenren tsütsü atsütepa aliba raksatsütsü asoshi tekumdangtsü ka liasü ta ashi.

Ozüng alema mapa tamajung inyakba ken o jembiba den külemi Yoon ya tir menden nungi atsüngdoktsü asü masü ta court ajanga telemteba agitsü. Iba telemteba ya anogo 180 tsüngta agitsü imlar.

South Korea tir dak December 14 nü tai tongloktsü. South Korea nung conservative tir dak tai tongloktsüba ibai tanabuba liasü.

US-i Greenland angutsü südi ta amanger: Donald Trump

Washington, Aenjeti/

January 26 (Agencies): Tawa US Tir Donald Trump-i autonomous Danish territory agitsü asoshi tejangraba sayuba sülen US-i Greenland amokbangtsü imlar ta ashi.

Honibarnü Air Force One nungi osangbener den jembiang, “Asenoki agitsü ama nibo bilemer,” ta ashi aser iba asetkong nung alir nisung 57,000 yagia asenok den liner ta shisem.

Danish Ato Kilonser Mette Frederiksen-i taoba hopta tir den phone ajanga jembiang Greenland ya ayoktsü atema masü ta nenshia ashiba sülen Trump-i iba o ya jemi.

Trump yagi 2019 küm pa mezüng kümsük mapang iba Arctic territory alitsü indang jembiang liasü aser international security atema US-i Greenland agitsü ka kangasa nungdak lir ta ashi.

Tir indang tayimtsü nung aliba press room nung osangbener temi iba asetkong indang asüngdang dang, “Nüburtemia asenok den liner ama bilemer,” ta Trump-i ashi.

“Denmark-i yangji kechi nung kibur akumtsü aliar ni memetet, saka parnoki yamaji meinyakra ajibo mapa kanga tamajung asütsü, kechiaser ibai “free world” kumzuka ayutsü asoshi lir,” ta pai ashi.

“Greenland ya asenoki angutsü ama ni bilemer, kechiaser ibai alima indang freedom asoshi lir. Asenoki freedom agütsütsüba dak alaka yangji United States



kecha mali,” ta US tiri ashi.

Trump-i temulung lema jembiyonga Greenland aser Denmark indang ato kilonseri taoba mapang iba asetkong ya tayoktsü asoshi masü ta shia lir.

Greenland indang Ato Kilonser Mute Egede-i, iba li amshitsü ya Greenland tebilemstü ta ashi saka pai defence aser mining tsütsü US den tali jungtepa inyaktsü mulunga aliba lemsatepa liasü.

Kasa mapang Danish premiere Frederiksen-i ita tetenzüklen Greenland ya yangji alir meyong aser yangji alirtemi tarutsü tia atema telemteba agitsü ta shia liasü.

Taoba hopta Trump den minute 45 phone ajanga jembiang Frederiksen-i kasaji ashi ta osang ajanga ashir.

Greenland ya North America nungi Europe-i aoba lenmang tatsütiba nung lir,

anungji ibai US asoshi tongtipang akumer. Yangji American space facility tuluka lir.

Küm ishika Greenland indang ali rongsen nung temulung tali agüja arur, kong uranium aser iron ama alima nung angutsü tasak oset lir.

Iba asetkong ya autonomy süaka Denmark chuba yimli nung shilem ka ama lir.

Saka Greenland nung alir temi mapang ka independent kuma US den tesendaktep tasen ka atema lenmang lapoktsü imlar.

Tir Trump-i yamaji jembiaka Greenland nung alirtemi Greenland ya Greenland nung alirtem meyong ta ashir.

Tawa Trump-i iba ama o jembiba ajanga Denmark yimten anokshika ita tetenzüklen Copenhagen nunga senden mena liasü.

ANSKA-i linük aser state nem konang tetushi bener arutsü



Dimapur, Aenjeti/January 26 (TYO): All Nagaland Shaolin Kung-Fu Association-i tawa tembangba 5buba International Sports and Games Tournament nung gold medal 13 aser silver medal 4 ngua maneni Nagaland aser India nem konang tetushi bener arutsüogo.

Iba asayamung ya International All Sports Games Federation-i ayongzüka Phonetsholing, Bhutan nung January 21 nungi 23 tashi asaya liasü.

Team-i kanga junga asayaba sülen "Team Champion" title ngua liasü. Nagaland nungi asayar 17 aser team ketdangsür 5-i iba asayamung nung shilem agi, kong parnok linük balala nungi category balala nung asayartem den toktepogo.

Association-i parnok sponsors ajak dang kanga pelaba lemsatepogo. Association-isa, Angh La. Ganesan, State Youth Resource & Sports Department, Nagaland State Disaster Management Authority Joint CEO Shri. Dr. Johnny Raungmei, State Transport

Commissioner Shri. Elias T Lotha, DIPR Director Smti. Dzüvinuo Theünuo, Proprietor Seyie Auto and Seyie Gas Shri. Kuolacalie Seyie, Holy Cross Church Parish Priest Rev. Fr. John PM, Rev. Fr. Jojiang Daniel Gangmei Coordinator DBSA Dimapur Province, aser asayar tsürapurtem dang mejeta pelaba lemsatepa liasü.

Asayamung nung medal angurtem:

- Gold Medalists:

- Instructor Mr. Ahyunlo Jude Khing (under 75 Kgs)
- Assistant Mr. Namlang Zeliang (under 45 Kgs)
- Assistant Mr. Avisa Suokhrie (under 60 Kgs)
- Mr. Kivishe P Swu (under 55 Kgs)
- Mr. Abdul Aziz (under 50 Kgs)
- Mr. Amen Ali (under 65 Kgs)
- Mr. Joel D Rai (under 50 Kgs)
- Mr. Shobam Singh (under 55 Kgs)
- Miss. Paramita Paul (under 60 Kgs)
- Miss. Suma Meitei (under 40 Kgs)
- Master. David Keneingutuo

Sorunuo (under 95 Kgs)
- Master. Meyiesielie Albert Sorunuo (under 115 Kgs)
- Master. Ruokuo John Sorunuo (under 65 Kgs)

- Silver Medalists:

- Miss. Hitali (under 40 Kgs)
- Mr. Ikazo Debbarman (under 40 Kgs)
- Miss. Simren Singh (under 45 Kgs)
- Mr. Shahim (under 60 Kgs)

National Awards:

Association-isa parnok züngsem aseme national award anguba kanga nema danga sangdongogo.
- Master. Meyiesielie Albert Sorunuo: "Best National Kung Fu Technical Award"
- Master. David Keneingutuo Sorunuo: "Best Honour Award"
- Master. Ruokuo John Sorunuo: "Best Physical Trainer Award"
Maneni All Nagaland Shaolin Kung-Fu Association-i iba takok ya Nagaland aser India nung aliba nüburttem nem bendanga agütsüogo, aser tarutsü nunga martial arts asaya nung takok nguyonga aotsü imla ataba lemsatepa liasü.

Jannik Sinner-i Australian Open tebur kija asaya kokogo



Aenjeti/January 26, 2025 (Agencies): Deobarnü Australia Open tebur kija asaya final nung World No.1 Jannik Sinner-i Germany nung asayar Alexander Zverev straight sets nung koka pa indang career nung Grand Slam tasembuba kokogo.

Germany nung asayar yagi kanga meranga asayaka Sinner-i pa ya 6-3, 7-6 (7-4), 6-3 agi set asem nung koka pa indang title takok ngua defend süogo.

Iba asaya akokba sülen Sinner-i tasembuba Grand Slam aser Australian Open tanabuba kokogo. Taoba küm pai kasa asayamung final nung Daniil Medvedev koka mezüngbuba Grand Slam akok.

Rod Laver Arena nung Andre Agassi, Roger Federer aser Novak Djokovic nungeri dang iba asayamung anaben atonga koker liasü.

Sinner asoshi iba final akokba ya title abenba dang masü saka pa asüngsashitsü asoshi kanga tongtambang liasü. Ita aika pa tenokdangba agütsür aliba mozü amshiba dak sendakba nung mepetmesü nung arur, pa alima nung tajungiba asayar ta sayutsü atema iba asaya ya maongka tajung ka liasü.

Kasa mapang nung Zverev-a Honibarnü Madison Keys ama mezüngbuba Grand Slam akoktsü atema meranga asaya

liasü.

Pai Italy nung asayar ya 4-2 ta koka lir, saka arishi küm 27 tain asayar yagi pai nüngdakba mapang nung junga masayatetba jangja lir.

Final nung asayar naprongla yagi mezüngbuba set kanga tashi ita asaya tenzük aser 3-3 aküm. Ajisüaka iba sülen Sinner-i Zverev indang serve ka break süa 5-3 agi tejakdang aküm aser mezüngbuba set 6-3 agi koka liasü.

Tanabuba set nung asayar anapronglai pei service game merakzükdaktsüi asaya atuba sülen tiebreak asaya koka Italy nung asayar yagi 7-6 (7-4) agi koka liasü.

Tasembuba set nunga Sinner-i game trokbuba nung Zverev indang serve break asüba sülen pa indang serve ka danga break mesüdaktsüi asaya 6-3 agi koka Australia Open küm anabuba atonga kokogo.

United nungi asayar Antony Real Betis nung denogo

Aenjeti/January 26, 2025 (Agencies): Real Betis-i Manchester United winger Antony season tepeyong asayatsü atema tenangzüktepba ka yanglur loan nung anirogo.

Brazil nung arishi küm 24 tain asayar ya 2022 küm Ajax nungi pound million 81.3 agi alizük aser pa ya club nung sen tasaktiba agi aliba asayar tanabuba aküm.

"Tang asaya aliba season tatem tashi asayatsü atema Antony loan nung anir aotsü asoshi Real Betis aser Manchester United na mulungtepogo," ta Betis-i sangdong ka ajanga metetdaktsü.

Antony-i United nungi 92 ben asayaba mapang goal 12 idaktsüogo. Pa United nungi 2027 küm tashi asayatsü atema tenangzüktepba yanglur lir.

Ajax nungi aruba sülen winger yagi kanga junga asaya tenzük aser taoba United coach

Erik ten Hag kübok mezüngbuba asaya asem nung goal idaktsü, saka mapang tatsüka dang lir form samaoadok aser masayadaktsü aküm.

Kasa mapang nung domestic abuse dak sendakba nung Antony ya Brazil police-i bushisüngdanga liasü, koba pai magizüki liasü. Iba ken o ya 2024 küm August ita tembangogo.

Ten Hag-i ashiba agi, iba taitüsü ajanga asayar asaya yinya dak kongshia liasü.

Antony ya tang asaya aliba season nung Manchester United pur asaya ka nung danga tetenzük nung masaya aser substitute ama asaya ti nung asayaogo.

Ten Hag melener Ruben Amorim-i lanur asayar Amad Diallo tachichilen asayadaktsütsü telemetba agiogo, anungji Antony asayatsü atema maongka angutsü tasak asütsü.

PR Sreejesh nem Padma Bhushan agütsütsü



Aenjeti/January 26, 2025 (Agencies): Taoba mapang India tebur team hockey captain PR Sreejesh, India nung civilian tem nem agütsüba tetushi tematiba Padma Bhushan agütsütsü atema shimogo. Padma Awards asem rongnung iba ya tematiba lir aser kümshia Republic Day nü sangdonger.

India sorkari Honibarnü tetushi angutsüpur 138 sangdongba rongnung Sreejesh ya sports category nung tetushi angutsüpur pongu rongnung ka lir.

Sports category nung tangartem ya Harvinder Singh, IM Vijayan, R Ashwin, aser Satyapal Singh nung lir. Padma Awards ya India tir-i agizüka mapang tatsüka lir Rashtrapati Bhavan nung sentong ka agiba mapang agütsür.

Vijayan ya taoba mapang India nung nungtuugu football asayar ka lir aser Harvinder ya India nung rongnungi Paralympic nung archery nung mezüngbuba gold medal anguba asayar lir. Satyapal ya Para Athletics Coach ka lir shibai Paris 2024 Paralympics nung gold medal anguba asayar aser Khel Ratna-awardee high-jumper Praveen Kumar aniteta liasü.

Arishi küm 36 tain Sreejesh ya taoba küm Paris Olympics nung bronze medal anguba sülen asaya nungi anena liasü. Pa ya India nung rongnungi hockey asayar tajungtiba ka ta züngshir. Küm 18 tsüngda asaya 336 nung asayaba den Asian Games nung gold medal ana ngua asayaba sülen pa asaya nungi anen aser tang junior men's team coach lir.

Arishi küm 33 tain Harvinder-i, taoba küm Paris Paralympics nung individual recurve open category nung gold medal ngua liasü.

Kasa mapang nung arishi küm 55 tain Vijayan ya 2000 nungi 2004 tashi India tebur football team captain liasü. Pa mezüng national team nungi 90s nung asaya tenzük aser pai linük tenüng nungi asaya 79 nung goal 40 idakja liasü. Pa asaya aliba mapang 1993, 1997 aser 1999 küm South Asian Football Federation Championships kokogo.

Tatensa arishi küm 38 tain Ashwin, taoba küm asaya nungi anenogo. Pa ya Test asaya nung India nung asayartem rongnungi wicket timtiba agiba asayar tanabuba lir. Pa ya iba asaya asayaba bowler tem rongnung tajungtiba ka ta züngshir.

BILEMDANGANG

"Tazüokba makai nisung ka tejakleni motettsü."